



Food  
and  
Agriculture  
Organization  
of  
the  
United  
Nations



# EAA TE AKATEREANGA TAU O TE PAE ANGAANGA TAUTAI TIRATIRATU?



**EAA TE  
AKATEREANGA  
TAU O TE PAE  
ANGAANGA  
TAUTAI  
TIRATIRATU?**

Cook Islands

Translated by  
Eileen Dashwood

FOOD AND AGRICULTURE ORGANIZATION OF THE UNITED NATIONS  
Rome, 2001

The designation employed and the presentation of material in this information product do not imply the expression of any opinion whatsoever on the part of the Food Agriculture Organization of the United Nations concerning the legal status of any country, territory, city or area or of its authorities, or concerning the delimitation of its frontiers or boundaries.

ISBN 92-5-904541-X

All rights reserved. Reproduction and dissemination of material in this information product for educational or other non-commercial purposes are authorized without any prior written permission from the copyright holders provided the source is fully acknowledged. Reproduction of material in this information product for resale or other commercial purposes is prohibited without written permission of the copyright holders. Applications for such permission should be addressed to the Chief, Publishing and Multimedia Service, Information Division, FAO, Viale delle Terme di Caracalla, 00100 Rome, Italy or by e-mail to [copyright@fao.org](mailto:copyright@fao.org)

© FAO 2001

## **EAA TE AKATEREANGA TAU O TE PAE ANGAANGA TAUTAI TIRATIRATU?**

Te Pae Angaanga Tautai, koia te paranianga te opuanga e te oko atu anga o te ika, e pera te pamaanga e mea puapinga maata teia no te manga, te kimi puapinga e te tupuanga o te oraanga o te tangata o teiane i ao. E manganui uatu rai te tangata e irinaki nei ki te ika no to ratou oraanga. Me ka anoano ia kia rava te ika no te uki ki mua ka anoano ia te katoatoa e tautai nei kia turu i te taporoporo e te akatereanga a te pae tautai o teiane i ao.

No teia turanga i manako ei te anere e itu ngauru mema o te (FAO) putuputu anga Manga e te Tanutanu o te taokotaianga Basileia o teiane i ao kia akatupu ia te Akatereanga Tautai Tau i te mataiti e tai tauatini e iva anere e iva ngauru ma rima (1995). Teia Akatereanga ko te vaerua ngakau tae, kare i te mea opara ia inara te akara tamou iatu nei ki te katoatoa rava e tautai nei, me kore e angaanga nei na te Pae Angaanga Tautai e te pama noatu ki uta i te enua me kore ki te moana. No te mea oki e ko toou ngakau tae ua teia Akateretereanga, e mea tau rai te au tangata katoatoa e angaanga nei i roto i te angaanga tautai e te pama, kia oronga ratou i to ratou irinakianga ki te ture e te akakoroanga tei akaue ia mai.

E rua mataiti i te koikoiana e te akanoonoanga o teia au ture. Kua tae ria ia te tikaanga a te Akatereanga Tau na roto i te au mata o te au putuputuanga tukeke, te pae tautai a te kavamani o te au enua tatakita e te FAO. Kua rauka teia tikaanga manea na roto i te au putuputuanga tukeke tei piri ki roto te pae tautai e te pama. No teia tu manea i rauka ai i te Akatereanga Tau i te akatikatika e te arikianga atu i tetai au ta manakoanga pararauare a te pae tautai e te pama.

Ka akara matatio te kavamani kia tau te akatereanga a teia putuputuanga. Ka turu te FAO i te au angaanga raverave inara kare e na te FAO e akara i te tupuanga e te akakoroanga o te ture tautai o te ipukarea. Tei te kavamani ua teia tikaanga.

Ka puapinga ia teia Akatereanga me na te Kavamani e akanoono i te ture e te tamanakoanga o te ipukarea. Kia papu e ka turu ia teia tamanakoanga kia aravei atu te kavamani i tetai au ngai

angaanga e tetai au pupu tukeke kia turu e kia oparaia te au tamanakoanga. Piri atu ki teia kia turu te kavamani i te au ravenga tautai kia taea te akakoroanga a te Akatereanga Tautai Tau. Ko teia au akatereanga ka puapinga ia tei reira me ta angaanga meitaki ia.

Ko teia puka e akamaramaanga teia i te tu o te raveraveanga puapinga a te Akatereanga Tau. Te irinaki ia nei e ka riro teia au akamaramaanga ki te iti tangata no runga i te akakoroanga e te apainga a teia Akatereanga, kia turuia te Pae angaanga tautai katoatoa noatu te meangiti me kare te maata pera katoa te angaanga pama. Kare teia puka ei mono i te Akatereanga Tau mari ra ko te akakitekiteanga uatu rai i te au marama tei rauka.

Kua uri ia teia Akatereanga e te FAO ki roto i teai au reo Arabia, Tinito, Papaa, Varani e te Paniora. Kapiti katoa atu te Kavamani te pae angaanga puapinga e tetai au putuputuanga tukeke i te urianga i teia Akatereanga ki roto i tetai au reo ke mei te Alabani, Korotia, Etonia, Pasi, Tiamani, Itia, Itonisia, Itaria, Tipani, Porotia, Rutia, Sinali, Solovinea, Tamiri, Tahi e Turina. Ko te puka o teia au reo ka kitea ia ki runga i te Kupenga Tanuinui (website) a te FAO Pae Angaanga Tautai Kupenga Akarakara (internet).

Ki te au tangata te ka inangaro kia marama ratou i teia Akatereanga Tau ka rauka mai teia puka mei ko mai i te FAO Pae Angaanga Tautai Kupenga Akarakara i runga i te Kupenga Taniuniu. Teia te ngai nooanga.

<http://www.fao.org/fi/agreem/codecond/codecon.asp>.

Me kare aau kupenga taniuniu e tata atu ki te tuaanga angaanga maata, Chief of Service, FIPL/Fisheries Department, Food and Agriculture Organization, Viale delle Terme di Caracalla, 00100 Rome, Italy i tetai naau. E mea tau kia akamarama koe i taau reo ka inangarao no te Akatereanga Tau. Me e Arabia, Tinito, Papaa, Varani me kore Paniora.

## **KO TE AKAMATAANGA**

Ei akapapuanga no te ravenga meitaki no te raukaanga mai te ika no te au uki ki mua ka anoano ia te ture a te Akatereanga Tau kia akateimaa ia ki te pa enua ma te au tangata tei o ki roto i te

angaanga tautai, e te akatupu i te au mea ora i roto i te tai, kia rave kapiti i te taporoporoanga e te akatereanga tau o te oraanga o te ika e to ratou ngai nooanga. Ko te au tangata tei o ki roto i teia angaanga tautai kia aruaru e kia vai rai te turanga teitei no te numero ika e mou mai ana no teia ra e te au ra ki mua. Ko te tuatua Maximum Sustainable Yield ko te numero maata teia o te ika e rauka mai ana.

Teia te aiteanga ko te angaanga tautai a tetai uatu enua e tana au ture kia akatanoia ki runga i te manako e kia rauka mai tetai parani kia roa no te akapuapingaanga i te mou o te moana. Ko teia tetai ravenga i te akapapu atu anga i te oronga atu i te manga e te akaitianga i te ngere o te oraanga o te au tangata e irinaki nei ki runga i te ika.

No reira te akakoroanga tikai o te ture a te Akatereanga Tau koia oki ko te tauturuanga i te au pa enua e te ruru patireia kia akamaata ma te akameitaki atu i ta ratou au ravenga tautai e te akatupuanga i te au mea ora i roto i te tai ei ravenga kia tae riria teia akakoroanga.

E mea kitea ngoia ua teia e ko te akatupuanga e te tataanga i te au ture o te angaanga tautai, ka anoano ia te moni, te karape e te kite, te kare e kite ua ia i roto i te au enua turanga akaaka to ratou, e pera katoa te au enua rikiriki. Ko te ture a te Akatereanga Tau ko te akamaroiroi i te au Taokotaianga mamaata o teianeia ao mei te FAO i te tauturuanga i ta ratou au ravenga tautai kia meitaki mai tei reira.

Ko te Akatereanga Tau tei akamarama mai e ka akapeea te Pae Angaanga Tautai i te akatereanga i ta ratou angaanga tautai ma te tau tikai. Ka akaari mai te reira no runga i te akatupuanga i te au mea ora i roto i te tai e te pirianga o te angaanga ki tetai au tuanga angaanga i te pae taatai e te akonokonoanga e te oko atu anga o ta ratou ika. Ko te puapinga o te taokotaianga o te au enua tetai ki tetai i roto i te au putuputuanga tukeke o te angaanga tautai, kua akamarama meitaki ia mai te reira i roto i te ture.

Kare te Akatereanga Tau i akamarama meitaki mai e ka akapeea te au ravakai, te Kavamani i te raveanga i te au takaianga e te au mea te ka inangaroia kia ta angaangaia. No te reira tumu kua anga mai te FAO i tetai au tumu manako tukeke ei turu i te au akaereanga a te Akatereanga Tau. Ko te akakoroanga o teia akanoonoanga ei oronga mai i te tauturu no runga i te raveraveanga o te angaanga ki te au ravakai, ki te pae angaanga tautai e ka akapeea ratou i te raveanga

i te au takaianga kia angaanga tei reira kia tau ki tei tamanako ia.

## **KO TE AKATEREANGA A TE PAE ANGAANGA TAUTAI**

Te anoano nei te Akatereanga Tau kia atu te au enua i tetai au tamanakoanga manea kia rauka ia ratou i te akatere i ta ratou angaanga tautai ma te tau.

No te mea e rauka ana te tua i te mou o te enua tetai ki tetai e mea tau rai kia kitea te tu taokotai o te au enua i roto i te angaanga tautai, taporoporo e te akatereanga tau. Kua anoano te Akatereanga Tau i te akamata i tetai au taokotaianga tautai i roto i tetai au ngai ou me kare kia akamata ia tetai au taokotaianga Tautai tei akamata ke ia ana kia akamatutua. Ko te taokotaianga na roto i teia mataara ko te ravenga papu okotai ua teia kia taea te akakoroanga mamao tei urirui ia i roto i te au manako tei taikua ana. Ko te angaanga a teia Taokotaianga Tautai, akara iatu ki raro ake i te turanga o te taokotaianga rikiriki e te taokotaianga mamaata o teia nei ao.

E mea puapinga i tetai au putuputuanga tautai akatereanga tautai kia taokotai tikai i te akakoroanga o te au mea ka anoano ia kia marama tikai te au ravakai.

Ka anoanoia te pae Angaanga Tautai kia akatere meitaki i te opuanga e te akateateamamaoanga o te ika ki roto i te au mataara tukeke te ka akaiti i te kino ki runga i te au mea natura, te ka akaitianga i te repo e te taporoporoanga i te turanga meitaiki o te ika tei rauka mai. Ko te au ravakai kia tata ratou e kia akairo i ta ratou i rauka. Kia rauka i te kavamani i te akaketaketa i te ture e tana au akatereanga no te kimianga o te akautuanga i te aronga tei aati i te ture. Tei roto te moni utunga e pera te rave ke anga i tona tikaanga tautai.

I te akateateamamaoanga no runga i teia au ture nei kia akapuapinga te au enua i te au marama ou e vai nei e te akamanako katoa i te au ravenga tautai i mua ana e to ratou kite. Mei te mea e kare te marama ou e rauka mai kia rave te au enua ma te matakite tikai i te akanooanga i te kotinga o te angaanga tautai.

I te akateateamamaoanga no runga i teia au ture nei ka anoanoia

te au basileia kia akara atu i tetai au tumu manako. Ko tetai o teia au mea ko te puapinga ka rauka mai i te tautai e te au mea ka tupu ki te au apinga natura e te oraanga o te iti tangata na roto i te tautai.

Kia akamaroiroia te au tangata e te au putuputuanga i te tua i to ratou marama e to ratou manako no runga ite manamanata o te angaanga tautai. Kia apai katoa ia tetai manako takake ki runga i te ngere o te au tangata rikiriki tei irinaki ki runga i te angaanga tautai. Kia apai katoa ia tetai manako takake ki runga i te ngere o te au tangata rikiriki tei irinaki ki runga i te angaanga tautai no to ratou oraanga. Ko te au enua e mea tau ia ratou kia aruaru i te apii e te tereni i te au ravakai e te au tangata pama kia rauka ia ratou te akatupu e te ta angaanga i te au ture ei akapapu e ko te au parani akameitaki atu i te angaanga tautai i teia ra e te au ra ki mua.

Ei paruru i te mou o te moana ko te akaaruru paura te poitinianga ika e tetai au ravenga kino ei takino i te angaanga tautai kia paruru ia te reira i te au enua katoatoa o teia nei ao.

Kia akapapu te au enua e ko te au pai tautai te tautai ara ki roto i to ratou moana kua retita ia. Ko teia tu tautai kia rave ia i roto i te tu tau e kia aruia te ture e te akatereanga a tetai uatu enua.

Ei parururu i te tautai taukore (me maata te ika i opuia ka iti to te tuatau ki mua). Ko te tu o te au pai tautai auraka kia maatamaata uatu ei no te tari mai i te ika kia tau ua.

Kapiti atu ki te reira ko te kino o te au apinga tautai ki roto i te moana (ka kitea mai ki runga i te akau e te kaa: ei akara anga) kia rava te marama i mua ake ka ta angaanga ia ai tetai apinga tautai. Ko te au apinga tautai kia riro mai tei reira i te akaiti i te repo kia maata te turanga o te ika tei ora mai. Ko te au apinga tautai kia akaiti ia mai te tu opu ika te kare e inangaroa ia (kare i akakoroia kia mou mai) me kare te au ika te ngaro atura. Ko te au apinga me kore ravenga tautai tei kore i akara meitaki ia tei riro mai ei kaimoumou maata kia takore iatu te reira.

Ko te pai tari ika kia oko ia mai te reira ma te akamanako kia kore e maata te tita. Te au ona pai e te aronga angaanga o te au pai tautai kia papu ia ratou e ko te urianga i te repo ki roto i te moana kare te reira e riro mai ei kino maata.



Ei parururu i te reva meitaki kia anga te au patireia i tetai ture ei akamou ki runga i te akaitianga i te tukuanga mai i te reva kino mei roto mai i te ngai akaanuanuanga o te pai. Ko teia au apinga kia takore rava ia te reira.

Ko te au ngai puapinga e noo ana te ika, mei te ngai vai, ngai varivari, te akau e te roto kia paruru meitaki ia tei reira mei te kino. Me na te au mea natura e akatupu i te kino ki te apinga tautai kia teateamamamo te enua i te rave i tetai ravenga viviki no te taporoporo e te akatereanga tau me inangaro ia ake.

### **TE AU PATIREIA E ORONGA ANA I TO RATOU REVA KI VAO**

Ko te au enua e pai tautai to ratou e te tautai nei ki vao ake i to ratou moana na ratou rai e akara e kua rauka te pepa tautai a tereira au pai e kua akatikaia ratou kia tautai. Ko te au enua kia tata e kia rekoti ratou i to ratou pai e ta ratou i mou mai e tautai ana ki vao mai i to ratou moana.

Ko te au enua e oronga nei i te reva ki tetai pai tautai kia papu tikai iaia te mako uara e te meitaki to ratou oraanga e kua paruru ia teia au pai no tetai manamanata ka tupu mai. Ko te mea maata ra kia akairo meitaki ia te au apinga tautai e te au pai kia tau ki te ture o te patireia e to vao mai. Me tupu te manamanata ki tetai tangata no vao mai ka anoanoia kia akakite iatu teia ki te enua no reira mai.

### **TE AU ENUA E UAPU TO RATOU**

Kia akanoonoo te au enua i tetai au paranianga e te ture no te tutaka atu anga i te au pai tautai no vao mai mari ua ra ki te pai kua noo takere ki roto no tetai turanga tukau, ka riro teia ei tauturu i te kimianga e kua papu e pai tautai tikai teia. Kia turu te au enua tei retita ia te pai ki reira, i te tuatau e pati mai ei i te tauturu no te kimikimianga i te apa o to ratou au pai.

Ko te au ava e te au ngai uruanga ei au ngai meitaki tei reira no te au pai tautai. Ko teia au ngai kia rauka tetai ngai maanianga pai e te ngai no te aronga oko mai e te oko atu i te ika. Kia rava te vai, te akono anga o te are meangiti e te ngai takore anga atu i te reira.

## **AKATUPUANGA PAMA**

Ko te akakoroanga maata o te pama ko te paruruanga atu i te au ika tukeke e pera katoa ki te akameangiti i te au kino ki runga i te ika o te moana ma te akamaata atu i te ika o te oraanga o te tangata.

E maata atu te okotai tangata e taangaanga nei i te au mea natura mei te vai, te roto e te enua. I te akakore atu i te au manamanata te ka tupu ki te aronga e taanangaanga nei i te au mea natura kia parani atu te au patireia i te akapapu atu anga e ko teia au apinga natura kia tua tuaia ma te tau.

Kia akara matatio te au patireia e auraka te oraanga o te iti tangata, e to ratou tikaanga no te akakoroanga akapuapinga o te au ngai tautai kia kore te angaanga pama e ta kinokino mai i te reira. E mea tau kia raveia tetai akanoonooanga no te akara atu anga ki te au mea ka tupu ki te au mea natura me ka angaia tetai pama. Piri atu ki teia kia akono meitaki ia te tu o te kai e te maniva e taangaanga ia ana ki runga ite pama. E mea tau kia mako te ta angaanga anga o te au vairakau kia kore te kino e tupu ki runga i te au mea natura.

E mea tau oki kia akakite te au enua ki te enua i te pae mai ia ratou i te ka tupu no runga i te angaanga pama ika i mua ake ka pama ei ratou i tetai au ika tukeke. Ei akaiti i te maki mei roto mai ite au ika ou tukeke kia taokotai e kia akatika te au patireia i tetai akatereanga tau no te apai anga i te au mea ora mei tetai ngai ki tetai. Me parani ia tetai akatupuanga pama kia akatupu katoa te au enua i tetai ngai angaanga raverave e tetai ngai vairangaanga o te au ika te ngaro atura. (Ka mate teia me kore e ravenga viviki e rauka)

## **KO TE AKATAOKOTAI ANGA O TE PAE ANGAANGA TAUTAI KI ROTO I TE AKATEREANGA ATE PAE TAATAI**

Ko te au tangata e te au ravakai e noo ana ki te pae taatai i to ratou oraanga kia ariki ia to ratou manako, te paranianga e te akapuapingaanga o te reira au ngai.

I te au ngai pae taatai e taangaanga maata ia ana kia akano ia te au akaueanga a te pae angaanga tautai kia kore e manamanata e tupu mai ki roto i te au ravakai e tetai aronga ke atu, e me tupu tei reira ka rauka te tika meitaki na roto i tei akanoonooia. Ka inangaro katoa

ia rai te au enua e to ratou pae taatai kia taokotai ki te au enua mei ia ratou te tu kia taporoporo e kia akatere meitaki i te reira.

## **I MURI AKE I TE KOKOTIANGA O TE IKA E TE AKAEREANGA OKOOKO**

Kia akamaroiroi te au enua i to ratou iti tangata kia kai i te ika ma te akara meitaki e kua mako te raveanga e ka tau i te kai. Ko te turanga o te ika kia teitei tei reira na roto i te akonoanga e te turuanga a te kavamani i te paruru i te oraanga o te aronga e kai ana i te ika e te paruru atu anga i te okooko pikakaa. (koaia oki ko te oakeanga i te marama tarevake o te oko ika ki te aronga okooko atu). Kare oki e ko te reira ua mari ra kia taokotai te au enua i te akatu i te au ngai repoanga e ta ratou porokaramu no te tikaanga tautai.

Ko te au tu akonokonoanga o te ika, te tarianga e te ngai vairanga anga o te ika kia tau kia kore e riro ei kino i te au mea natura. Ko te au ika ruti i muri ake i te tuatau kokotianga kia meangiti ua tei reira; (ko te ika i opuia mai te kare e inangaroia) kia ta angaanga ua iatu rai e ko te vai, te uira e te rakau i te tuatau e akonokono ia ara te ika kia rave meitaki ia te reira. I te au taima ravarai kia akamaroiroi ia te turanga o te au ika, ka okoia no te mea e moni meitaki te rauka mai ana ki te au ravakai.

Ko te ture a te au enua no te akaaereanga e te akonoanga o te ika kia mama ua, e kia aiteite ki te au ture tei akanooia e te au enua o teia nei ao. Te au ravakai, putuputuanga natura e te au aronga e kai nei i te ika e mea tau rai kia uriuri manako te au enua kia ratou me ka anga me kore akara akaouia te au ture no runga i te ika. E akakite atu tetai uatu enua ki vao mai iaia me te anoano nei iaia i te tieni i tana ture. Kia rauka tetai tuatau no teia au enua i vao mai no te tieni i ta ratou ture, no te oko mai e te okoanga atu.

Te au putuputuanga ika a te enua e te au pupu oko ika kia aravei ia ratou i te tuatau e akaraka ara te au patireia me kore tua ara ma te akara akaou i te ture e te au akonoanga. I te tuatau e akanoonoo ia ara me kore e tieni ia ara te ture a te enua. Kia akakite iatu ki te enua i vao mai e kia oronga ia tetai tuatau no te tieni anga ta ratou i manako e ka tau no ta ratou oko mai me kore oko atu anga.

E mea puapinga tikai i te aronga oko ika o teanei ao kia kore ratou e piri ki roto i te oko i te ika te ngaro atura mari ra kia taokotai te au patireia i te akonoanga i te ture e te akaueanga o runga i te okoanga atu i te au tu ika te ngaro atura.

## **TA TE PAE ANGAANGA TAUTAI KIMIANGA MARAMA**

Kia marama te au enua e ka na roto mai i te kimikimianga oonu e rauka mai ei i te tu tamanakoanga a te pae angaanga tautai tiratiratu. No reira e mea tau rai kia ariki te au enua i ta ratou mapu e angaanga ana ki roto i teia kimikimianga marama. Ka anoano ia te au putuputuanga o teianeia ao kia turu i te au enua e rave i teia angaanga kimianga marama i te pae tautai e te akapakari atu i te turu i te au enua kare e tukatau roa ana.

I mua ake ka akanoonooia tetai akarakaraanga kia akara matatio te au enua katoatoa i te turanga o te ika e to ratou ngai nooanga e te tuke o te au taii te ka tupu ki te au ika. Kia akaputupu katoa ia tetai akapapaanga no te au tu apinga tautai te ka taangaanga ia ki te au ika e manganui e ki tetai uatu ngai ke. Ko teia akarakaraa anga e mea puapinga maata ki tetai uatu enua e parani nei i te tomo ki roto i te tautai kimi puapinga.

E mea tau kia taokotai te au enua i te kimi matatio i te marama no te katoatoa. I ta te aronga kimi marama e rave ara ki roto i to tetai enua ke tai e mea tau rai kia rave ia tei reira ma te aru i te ture tautai a teira enua. Ko te angaanga tautai e te tuatua akakiteanga marama mea tau rai kia tuku iatu ki te au putuputuanga tautai katoatoa e te au enua tei inangaro, kia viviki atu tei reira.

## **TAOKOTAIANGA RIKIRIKI E TO VAO MAI I TEIA NEI AO**

Kia marama tikai te au enua e ta ratou au putuputuanga tautai e mea tau kia taokotai ratou i te raveanga i te angaanga a te pae angaanga tautai. Me e tautai iana e tai tu ika kia aiteite te akatereanga a tetai enua ki tetai. E pera katoa na roto i te turuanga i te au taokotaianga rikiriki ka akaiti te reira i te manamanata no runga i te pae tautai te ka tupu mai. Me te mea e tupu mai tetai mamanata ki rotopu i te au enua mea tau rai kia akatano viviki ia te reira ma te au e

te tau tikai.

Ko te au pupu tautai rikiriki kia tau ia ratou kia pati i tetai tauturu no ko māi i to ratou au mema i te turu atu te taporoporoanga, akatereanga e te kimikimianga marama. Kia akatika katoa ia tetai au mata mei roto mai i te putuputu angaanga tautai o te reira ngai kia piri atu ki roto i te angaaanga a te putuputuanga tautai rikiriki.

## **EAA TE AITEANGA I TEIA AU MEA KATOATOAA**


No te mea ka anau ua rai te ika e mea puapinga kia anga te patireia i tetai au ture e tetai au akaueanga kia rauka i te iti tangata i te tautai i te au ika i te au mataiti ravarai. Pera katoa te angaanga pama ika ka inangaroia kia akamatutuia te au kimikimianga te kare e takingakino i te au mea natura e te oraanga o te iti tangata no te mea ko teia au takaianga ka riro mai te reira ei akapuapinga i te oraanga o te iti tangata pama e to ratou au enua.

Me ka rave meitaki te iti tangata katoatoa i te angaanga tautai e te angaanga pama tei akaue ia i raro ake i te Akatereanga Tau a te Pae Angaanga Tautai Tiratiratu ka puapinga tei reira ki to ratou oraanga e ka maata te ika i te au taime ravarai no te au uki ki mua.

Ko te Akatereanga Tau i raro ake i te akaaereanga a te pae angaanga tautai tiratiratu, te pati ia nei te au enua e to ratou iti tangata kia taokotai i ta ratou ture tautai kia riro mai te turanga tautai ei mea puapinga kia ratou. Me akara mamao iatu ka riro mai teia taokotaianga ei akameitaki atu i te turanga o te ika, pera katoa ki te akatinamouanga i te tauturu o te kai o te moana ki te oraanga kopapa o te iti tangata e ta ratou kimianga puapinga.

Me ka taokotai te au patireia o teiane i ao i te turu i te au tu tautai tiratiratu ka maata uatu rai te ika no te au uki ki mua. Te irinaki nei te pae angaanga tautai o FAO e kua rauka mai tetai marama noou no roto mai i teia tataanga e ka turu atu koe i te akamaroiroi e te akatupuanga i te mou o te moana e te au pama ika o teiane i ao na roto i te Akatereanga Tau.

Ko te au akamaramanga e te oora atu anga i te au manako i roto i teia puka, kare oki teia i te mea tamanako ia mai e te FAO e kia kopae iatu te tikaanga o tetai uatu patireia i te rave i tana uarai i tamanako.



E puka akamaramaanga teia i te au tu akaaereanga a te Akatereanga Tau a te Pae Angaanga Tautai Tiratiratu. Ko te akakoroanga maata a te Akatereanga Tau ko te akamaroiroi i te au ravenga meitaki o te angaanga tautai e te angaanga pama.

Kare teia puka e mono i te Akatereanga Tau a te tautai mari ra ko te akaari atu anga i tetai au akakitekiteanga oonu mei roto mai i te Akatereanga Tau a Te pae Tautai kia marama tikai te aronga te ka rave i te angaanga o te tautai.